

UDHËZIM
Nr.5, datë 28.12.2007

PËR TARIFAT E SHËRBIMIT PËR LEJET MJEDISORE

Në mbështetje të nenit 102 të Kushtetutës dhe në zbatim të pikës 1 të nenit 43 të ligjit nr. 8934, datë 5.09.2002 “Për mbrojtjen e mjedisit”,

UDHËZOJ:

1. Angazhimet e agjencive rajonale të mjedisit dhe të Ministrisë së Mjedisit, Pyjeve dhe Administrimit të Ujërave për shqyrtimin e kërkesës dhe marrjen e vendimit për lejet mjedisore, vlerësohen si shërbime ndaj të tretëve dhe paguhen nga kërkuuesi në formën e tarifave të shërbimeve.

2. Vlera e tarifës përfshin shpenzimet administrative, si dhe të gjitha veprimtaritë konkrete të agjencive rajonale të mjedisit dhe të Ministrisë gjatë procesit të shqyrtimit të kërkesës për miratimin e projektit dhe të dokumentacionit shoqërues dhe marrjes së vendimit përkatës.

3. Tarifa e paguar është e pakthyeshme, pavarësisht nga fakti, nëse kërkesa miratohet ose jo përfundimisht nga Ministri i Mjedisit, Pyjeve dhe Administrimit të Ujërave.

4. Tarifa duhet të jetë e paguar në momentin e dorëzimit të dokumentacionit e të regjistrimit të tij në protokoll.

5. Tarifa e shërbimit paguhet edhe për veprimtaritë me karakter vendor që ndikojnë në mjedis dhe që miratohen nga agjencitë rajonale të mjedisit në bashkëpunim me organet e qeverisjes vendore dhe që pajisen me autorizim mjedisor ose pëlqim mjedisor.

6. Tarifa derdhet nga propozuesi në bankë, në adresën: Ministria e Mjedisit, Pyjeve dhe Administrimit të Ujërave, Raiffeisen Bank, nr.llogarie 317/4302, përshkrimi; tarifë për deklaratë mjedisore, leje mjedisore, autorizim mjedisor ose pëlqim mjedisor (sipas rastit).

7. Shpenzimet e përgatitjes së raportit të vlerësimit të ndikimit në mjedis, të diskutimit publik, të shqyrtimit dhe këshillimit, përballohen nga propozuesi. Këto shpenzime nuk janë pjesë e tarifës së shërbimit.

8. Përcaktimi i tarifës së shërbimit bëhet mbi bazën e kohës dhe mjeteve të shpenzuara gjatë procesit të shqyrtimit dhe marrjes së vendimit. Këtu përfshihen: shqyrtimi fillestar i dokumentacionit, klasifikimi i kërkesës për të vendosur nëse projekti do t'i nënshtrohet procesit të thelluar apo të përmbledhur të vlerësimit të ndikimit në mjedis, asistencë për subjektet që aplikojnë, komunikimet me organet që japin lejet e ndërtimit dhe të veprimtarisë, organet e qeverisjes vendore, inspektimin e vendit, këshillimin me organet e qeverisjes vendore, të zhvillimit urban dhe turistik, dhënien e mendimit dhe kushtet që duhen vendosur, përcjellja në Ministri, shqyrtimi në Ministrinë e Mjedisit, Pyjeve dhe Administrimit të Ujërave, këshillimi me palët e interesuara, debati publik, shqyrtimi në komisionin e shqyrtimit të kërkesave dhe marrja e vendimit deri në publikimin e tij.

9. Projektet dhe veprimtaritë e shtojcës 1 të ligjit “Për vlerësimin e ndikimit në mjedis” dhe strategjitë e planet e veprimtë për energjetikën, minierat, industrinë, transportin, bujqësinë, pyjet, për administrimin e burimeve natyrore dhe të pasurive minerale dhe për administrimin e mbeturinave, planet kombëtare dhe rajonale të rregullimit të territorit, për qendrat e zonat urbane dhe rurale, për zonat industriale, për zonat bregdetare, për zonat turistike, për zonat e mbrojtura dhe zonat me ndjeshmëri të lartë ndaj ndotjes dhe dëmtimit, kanë tarifa më të larta. Projektet dhe veprimtaritë e shtojcës 2 të ligjit “Për vlerësimin e ndikimit në mjedis” kanë tarifa relativisht më të ulëta. Projektet dhe veprimtaritë me karakter vendor që ndikojnë në mjedis dhe që pajisen me autorizim mjedisor ose pëlqim mjedisor, kanë tarifa më të ulëta.

10. Projektet dhe veprimtaritë që kryhen për mbrojtjen e mjedisit ose që jepen si ndihmë për Shqipërinë, përjashtohen nga tarifa e shërbimit për dhënien e lejes mjedisore dhe leja mjedisore u akordohet falas.

11. Mbështetur në kriteret e mësipërme, për dhënien e deklaratës mjedisore, tarifa e shërbimit është 50 000 (pesëdhjetë mijë) lekë.

12. Për dhënien e lejeve mjedisore do të aplikohen këto tarifa shërbimi:

a) Tarifa e shërbimit për lejen mjedisore të projekteve dhe veprimtarive në industrinë

energjetike, si: rafineritë e naftës dhe të gazit; lëngëzimi dhe përpunimi i qymyrit dhe rërave bituminoze, impiante për rigjenerimin e vajrave të përdorura; hidrocentrale; termocentrale; depozita të mëdha për magazinimin për qëllime tregtimi apo ruajtje për naftën, nënproduktet e saj dhe produktet kimike, impiante industriale për prodhimin e energjisë, avullit dhe ujit të nxehtë; uzina për gazifikimin dhe lëngëzimin e qymyrit dhe të rërave bituminoze etj., kur projekti apo veprimtaria i përket shtojcës 1 të ligjit “Për vlerësimin e ndikimit në mjedis”, tarifa është 50 000 (pesëdhjetë mijë) lekë, kur ato i përkasin shtojcës 2 të po këtij ligji, tarifa është 30 000 (tridhjetë mijë) lekë.

b) Tarifa e shërbimit për lejen mjedisore të prodhimit dhe përpunimit të metaleve, si: uzina të shkrirjes së mineraleve, kalçinimi dhe pjekja e mineraleve që përmbajnë elemente toksike, uzinat për prodhimin e gizës dhe çelikut, uzinat ose fonderitë për përpunimin e hekurit, fonderitë, uzina për trajtimet sipërfaqësore të metaleve dhe materialeve plastike; prodhimi i hekurit të kuq dhe çelikut me derdhje të vazhdueshme, shfrytëzimi i minierave të mineraleve metalore, fabrikat e pasurimit të mineraleve etj., kur projekti apo veprimtaria i përket shtojcës 1 të ligjit “Për vlerësimin e ndikimit në mjedis”, tarifa është 50 000 (pesëdhjetë mijë) lekë, kur ato i përkasin shtojcës 2 të po këtij ligji, tarifa është 30 000 (tridhjetë mijë) lekë.

c) Tarifa e shërbimit për lejen mjedisore të nxjerrjes dhe përpunimit të materialeve bazë që nuk kanë në përbërje minerale xeherore, si: prodhimi dhe përpunimi i aliazheve për metale jo ferrike, nxjerrja dhe përpunimi i qymyrit, linjitit dhe mineraleve bitumene, nxjerrja e naftës e gazit natyror, fabrika për prodhimin e çimentos, gëlqeres, qelqit, përfshirë fibrat e xhamit; fonderitë për shkrirjen e substancave minerale, përfshirë prodhimin e fibrave minerale, fabrika për prodhimin e qeramikës; guroret dhe minierat e hapura të argjilave ose nxjerrja e torfes, nxjerrja e mineral-inerteve nga drenazhimi detar dhe lumor, shpimet e thella, nxjerrja e qymyrit, naftës, gazit natyror dhe rërës bituminoze, shkrirja fillestare dhe prodhimi i gizës dhe çelikut etj., kur projekti apo veprimtaria i përket shtojcës 1 të ligjit “Për vlerësimin e ndikimit në mjedis”, tarifa është 50 000 (pesëdhjetë mijë) lekë, kur ato i përkasin shtojcës 2 të po këtij ligji, tarifa është 30 000 (tridhjetë mijë) lekë.

d) Tarifa e shërbimit për lejen mjedisore të projekteve dhe veprimtarive në industrinë kimike, si: prodhimi i kimikateve organike dhe inorganike bazë, prodhimi i plehrave me bazë fosfatike ose fosfatike azotike, prodhimi i produkteve me bazë bimore, impiantet që përdorin proceset kimike ose biologjike për prodhimin e produkteve me bazë farmaceutike, bojërave dhe pesticideve, impiantet kimike që prodhojnë lëndët shpërthyes, shtesa ushqimore proteinike, fermente, trajtimi i produkteve të ndërmjetme dhe prodhimi i kimikateve etj., kur projekti apo veprimtaria i përket shtojcës 1 të ligjit “Për vlerësimin e ndikimit në mjedis”, tarifa është 50 000 (pesëdhjetë mijë) lekë, kur ato i përkasin shtojcës 2 të po këtij ligji, tarifa është 30 000 (tridhjetë mijë) lekë.

e) Tarifa e shërbimit për lejen mjedisore të projekteve dhe veprimtarive të industrisë ushqimore, si: prodhimi i vajrave dhe yndyrave shtazore dhe bimore, përpunimi dhe ambalazhimi i produkteve bimore, prodhimi i produkteve bulmetore, prodhimi i birrës, prodhimi i shurubeve dhe ëmbëlsirave, fabrikat e peshkut dhe vajit të peshkut, fabrikat e sheqerit, prodhimi i pijeve joalkoolike, prodhimi i produkteve ushqimore, fabrikat e blojës, siloset dhe fabrikat e prodhimit të ushqimeve për blegtorinë, thertoret etj., kur projekti apo veprimtaria i përket shtojcës 1 të ligjit “Për vlerësimin e ndikimit në mjedis”, tarifa është 50 000 (pesëdhjetë mijë) lekë, kur ato i përkasin shtojcës 2 të po këtij ligji, tarifa është 30 000 (tridhjetë mijë) lekë.

f) Tarifa e shërbimit për lejen mjedisore të projekteve dhe veprimtarive të industrisë tekstile, të lëkurëve, të drurit dhe letrës, si: prodhimi i fibrave të kartonit nga druri ose materiale me fibra të ngjashme, impiante industriale për prodhimin e pulpës nga lëndët drusore ose fibrave të tjera të ngjashme, letrës dhe kartonave, paratrajtimin ose lyerjen e fibrave dhe tekstileve, trajtimin e lëkurëve dhe thundrave, përpunimin dhe prodhimin e celulozës, prodhimin e mobilieve etj., kur projekti apo veprimtaria i përket shtojcës 1 të ligjit “Për vlerësimin e ndikimit në mjedis”, tarifa është 50 000 (pesëdhjetë mijë) lekë, kur ato i përkasin shtojcës 2 të po këtij ligji, tarifa është 30 000 (tridhjetë mijë) lekë.

g) Tarifa e shërbimit për lejen mjedisore të projekteve dhe veprimtarive të industrisë së gomës, si: prodhimi dhe përpunimi i produkteve me bazë rezinash natyrore dhe sintetike, riaftësimi i gomave të përdorura, kur projekti apo veprimtaria i përket shtojcës 1 të ligjit “Për vlerësimin e ndikimit në mjedis”, tarifa është 50 000 (pesëdhjetë mijë) lekë, kur ato i përkasin shtojcës 2 të po këtij ligji, tarifa është 30 000 (tridhjetë mijë) lekë.

h) Tarifa e shërbimit për lejen mjedisore të projekteve dhe veprimtarive të administrimit të mbetjeve, si: impiante për përpunimin dhe asgjësimin e mbetjeve të rrezikshme apo të mbetjeve urbane, impiante për përpunimin dhe asgjësimin e mbetjeve të degëve të ndryshme të industrisë, vendgroposjet (landfillet), vendet e depozitimit të mbetjeve industriale, vendet e depozitimit të inerteve, impiantet e përpunimit të mbetjeve të blegtorisë, shpendëve e peshkut etj., kur projekti apo veprimtaria i përket shtojcës 1 të ligjit “Për vlerësimin e ndikimit në mjedis”, tarifa është 15 000 (pesëmbëdhjetë mijë) lekë, kur ato i përkasin shtojcës 2 të po këtij ligji, tarifa është 8 000 (tetë mijë) lekë.

i) Tarifa e shërbimit për lejen mjedisore të projekteve dhe veprimtarive të tjera (impiante të ndryshme) për: testimin e motorëve, turbinave, reaktorëve, shkatërrimin e lëndëve eksplozive, për prodhimin e fibrave minerale artificiale (betoneve); për rritjen intensive të shpendëve, derrave e bagëtive të imta; rrugë për testimin dhe garat e mjeteve të motorizuara; projekte të fushës së mbrojtjes dhe të sigurisë kombëtare, depo etj.; bujqësi, silvikulturë dhe akuakulturë: dhe shpyllëzimi; menaxhimi i ujërave për nevoja bujqësore; fermat e peshkimit; marrja e tokës nga deti; rregullimet e lumenjve etj., projekte të infrastrukturës: projekte të zhvillimit industrial, urban; të qendrave të blerjes dhe parkimet e automjeteve, ndërtimi i linjave hekurudhore, aeroporteve, rrugëve, porteve, rrugëve ujore në brendësi të tokës, tramvajeve, dampave dhe rezervuarëve, ndërtimi i ujësjellësve, nxjerrja e ujërave nëntokësore dhe skemat e rimbushjes artificiale të ujërave nëntokësore, projekte për transferimin e burimeve ujore midis baseneve të lumenjeve, akuadukte etj., teleferikët e skive, portet turistike, fshatrat turistike dhe komplekset e hoteleve jashtë zonave urbane dhe të zhvillimeve të shoqëruara me këto lloj veprimtarish, zona të karavaneve dhe kampeve, parqet zbavitëse, rrjetet dhe antenat elektromagnetike jojonizuese, si dhe sistemet e transmetimit elektrik është 50 000 (pesëdhjetë mijë) lekë.

13. Në dhënien e autorizimeve mjedisore do të aplikohen këto tarifa shërbimi:

Tarifa e shërbimit për veprimtaritë e aneksit të I-rë të udhëzuesit nr.2, datë 21.5.2007 “Për miratimin e listës së veprimtarive me ndikim në mjedis, mënyrën e aplikimit dhe rregullat e procedurat e dhënies së autorizimit dhe pëlqimit mjedisor” grupohen si më poshtë:

a) për veprimtaritë e të gjitha pikave të aneksit të I-rë të udhëzuesit, tarifa e shërbimit është 10 000 (dhjetë mijë) lekë, me përjashtim të veprimtarive të pikave 4, 5, 8, 9, 15, 17, 19, 21, 25, 26, 27, 28, 29, 32, 34, 35 të aneksit tarifa e të cilave është 20 000 (njëzet mijë) lekë.

14. Në dhënien e pëlqimeve mjedisore, do të aplikohen këto tarifa shërbimi:

Tarifa e shërbimit për veprimtaritë e aneksit të II-të, të udhëzuesit nr.2, datë 21.5.2007 “Për miratimin e listës së veprimtarive me ndikim në mjedis, mënyrën e aplikimit dhe rregullat e procedurat e dhënies së autorizimit dhe pëlqimit mjedisor” grupohen si më poshtë:

a) për veprimtaritë e të gjitha pikave të aneksit të II-të të udhëzuesit, tarifa e shërbimit është 2 000 (dy mijë) lekë, me përjashtim të pikës 1, dhe 10 tarifa e të cilave është 1000 (një mijë) lekë.

15. Tarifa e shërbimit për përtëritje të lejeve dhe autorizimeve mjedisore do të jetë sa gjysma e tarifës për marrjen e lejes sipas këtij udhëzimi.

16. Me hyrjen në fuqi të këtij udhëzimi, udhëzimi nr.1, datë 30. 11.2005 “Për përcaktimin e tarifave të lejeve të mjedisit”, shfuqizohet.

Ky udhëzim hyn në fuqi pas botimit në Fletoren Zyrtare.

MINISTRI I MJEDISIT, PYJEVE DHE
ADMINISTRIMIT TË UJËRAVE
Lufter Xhuveli